

同州府續志

一
函
六冊

同州府續志卷十

良吏傳

左輔名宦臚敘前編載拾其遺遺愛斯傳三十年中
兵凶交困孰恤民瘼修政明信西漢盛治雖難僭擬
尙賴循能保我赤子述良吏傳第一

黃霸字次公陽夏人武帝末爲左馮翊領郡錢穀計簿書
政以廉稱時武帝以刑罰痛繩羣下俗吏尙嚴酷以爲強
而霸獨用寬和爲治後爲河南潁川太守及尹京兆治爲
天下第一五鳳間入爲相

張湛字子孝扶風平陵人矜嚴好禮動止有則居處幽室必自修整雖遇妻子若嚴君焉及在鄉黨詳言正色三輔以爲儀表建武初爲左馮翊修典禮設條教政化大興薛宣字子贛郿人成帝時詔補御史中丞後守左馮翊始高陵令楊湛櫟陽令謝游皆貪猾不遜持郡短長及宣視事陰求二人罪贓具得所受取移書顯責二人皆愧服解印綬凡得吏民罪名輒召告其縣長吏使自行罰長吏莫不喜懼宣爲吏賞罰明用法平而必行崇教養善眾職修理姦宄絕息自左內史初置以來未嘗有也

郭丹字少卿南陽人平帝時太守杜詩辟爲功曹轉遷左
馮翊永平三年爲司徒在朝廉直公正與侯霸杜林張湛
郭伋齊名顯宗會問羣臣郭丹家今何如宗正劉匡對曰
丹出典州郡入爲三公而無遺產子孫困匱帝乃訪求其
嗣官之
梁並永嘉初爲左馮翊時諸羌叛並以恩信招誘之於是
諸羌部等五萬餘戶並降隴右復平

達震字猛略代人武平初除華州刺史導民訓俗頗有治
方秩滿還朝爲百姓所戀

崔寬馮翊太守爲政務清簡所涖人愛之天寶間稱舊德
以寬爲首

解榮祖字聿修大華人中憲廉訪僉司德徵之

子爲韓城令多善政

張廷珪河南濟原人慷慨有志向第進士補白水尉舉制科異等累遷監察御史按劾平直武后元宗朝累有建白終太子詹事卒諡貞穆

陳堯咨堯佐之弟知永興軍長安地斥鹵無甘泉堯咨疏龍首渠注城中民利之

王臨永樂初任白水縣學教諭精通性理博貫經史勤於施教而善詩文有古人風學者慕焉

楊季琦交趾臨嘉人舉人正統初知澄城時聲教未融制

度尙缺琦至定法令布條約輕徭薄賦與民休息

陳仲秩巴縣人成化進士知華州蒞政精明專以德治杖人止於示辱而已太夫人有至德每臨政輒聽於屏後決事失平卽擊屏以警之故尤多仁恕云

王濂長垣人監生成化中任同州同知才識通敏修學有
功後陞太原府通判

李旻益都人舉人弘治中知同州政尙寬簡心多慈祥

妣鼎字伯謙蒲州人舉人嘉靖間韓城知縣時吏胥多不檢鼎至則約束如涇薪兩造聽訊隸人不敢索一錢廊吏

終歲食數斗粟抱文案趨承而已里甲飼馬外無別供上官遣隸人至韓則日給三飯飯之外不得竊逞隸人轉相告後遂絕跡於韓韓人以姒青天呼之

郭鼎襄陵人任澄城縣訓導守正不阿日以經義德行訓士卒於官去之日諸生引紼泣送至今不忘其德

陳睦字光宇諸城人進士隆慶中以工部郎左遷知同州清操特立識斷英敏常乘挽車循行田野境內震栗劉官營大盜盤據累歲莫敢誰何睦出不意提兵勦擒之

趙綱山西樂平縣舉人任華陰有清操性嚴不可犯吏胥

憚之民受其澤

朱迴澆潞安人歲貢崇禎十五年令白水文雅能詩明習吏事吏不敢欺會賊潛入城城陷猶力戰射賊遂與教諭魏歲史劉進同遇害

宋奎字文徵岳池縣人嘉靖初以舉人知郃陽縣事廉而不耀肅而惠六年郃大旱奎虔禱清獄寬逋禮賢卹民三日大雨歲大稔朝邑韓尙書邦奇曰僭恆暘若肅時雨若天人相感之際微矣宋君反諸身達諸政罔弗用禱是故鬼神格陰陽和霖雨作豈偶然哉十年又旱蓋郃地高而

土厚高恆風雲氣弗能交土堅不受澤雨微弗沃而大則
奔流赴壑也惟潤而久禾乃生故他邑不常旱郃常旱是
時知縣事者曰張道洪洞人韓尙書門人也救災策甚備
災弗能害二人者郃人皆勒石頌之

劉應卜商邱舉人宰郃陽大修學宮畱心實政每講鄉約
環而聽者數十人多感激泣下久之風移俗易所著有治
莘節目聖諭俗解保甲發明皆有裨吏治祀名宦祠

彭有義字思直順治三年任郃陽時亂初定有義撫殘黎
多方招來安集大兵驅寇抵皇甫莊疑縣民從賊將屠之

有義執不可帥怒罵有義忍辱百折乃免又能禮賢教士
四年擢知延安府郃人爲建生祠祀之歷任陝西按察使
多善政

錢萬選字子華長興例貢生康熙四十年知郃陽縣事政
尚寬以教養爲重而性喜結納蒞任初招集海內知名士
吳青霞啟元王崑繩源輩日夕講論爲育才計立社學數
十處按季課之自華雲葉公後郃邑文風丕振者萬選之
力也值農務興卽躬歷郊野以酒食勸勞焉每歲催科敲
扑不及里老任四載以註去纂郃陽新志未刻後訂爲宰

華遇食錄過俗吏遠矣

朱閑聖字嶧庭山陰籍雍正五年任邵陽遇事有條理剔奸弊不動聲色最大者邑之里馬歲累民數千金力請於督郵革之採買令下又以民食不足難辦陳於制府制府嘉其誠慤又免之其辦軍需也養駝及騾馬役頗煩而民不知擾一切修舉廢墜不費民間一錢接紳士必以禮任三載清操如水調蒲城去之日邵人咸攀轅號泣如失其慈母各憲聞之嘆曰不意朱令爲官使民感戴至此後知西安府升廣東糧驛道

福建通阿滿洲人由舉人知韓城縣廉靜寡欲甫下車邑城
崩塌數十丈通阿捐俸補葺不費民一錢南門石橋壞通
阿先架木爲梁以濟行人徐募金近萬成橋而貧民不與
焉在任五年杜請託絕交通律己以嚴御下以寬由是上
下相安聲聞遠邇眾謂與前任唐俱有長者之風焉唐名
桂生安溪人由進士知韓城其廉靜次於通阿

尹光桂新水人韓城縣丞其初至也值唐宰韓唐故廉靜
光桂輔理相得安分守己不取民一錢後至者爲棗強鄭
仔貪酷縱恣民畏之如虎嫌光桂挾制誣以罪去去之日

衣笥盡典於韓人咸寃之

東士秦江南丹陽人順治八年由貢生知澄城縣前令貪酷殘忍民不聊生公至悉反其所爲誠足動眾明能燭奸甫月餘巷祝輿頌歌聲載道不幸以瘡疾卒邑人斂金返

其喪焉去之日白裳素袍執紼號泣失聲者蓋千餘人按士

秦前志已載惟悉反前令苛政則略焉今補錄之徵信錄曰東公莅任月餘卒志失不載歷年久遠今遂無有知者余從敝簾中得先祖遺藁數頁有東公遺愛序又有口碑一篇文中盛稱其美因錄之以補邑志之闕

張承哲澄之潤東里人本姓惠以父御史公嗣太原張公由蔭生知澄城事慈祥愷悌敬事愛民以病卒於官卒之

日澄民無大小聞者莫不失聲每歲八月八日合祀於城

隍廟至今猶然

徵信錄曰張公康熙二十三年宰澄予聞其賢詢其政其詳已不可得初御史公出

奔時年少止知所生之里至縣則忘之矣及公宰澄知爲澄人未言也卒後其子弟方識其祖墓樹以柏焉公沒之一月有吏某忽狂言曰公某月日爲邑城隍神呼某廝役遂無病死隨又數吏皆如是卒故邑至今以城隍神爲公生爲正人死爲明神理或有之然此亦不足爲公重也

何達善字子兼濟源人乾隆丙辰進士由庶吉士外調恩平知縣卓異候陞委署澄城事甫下車剔革積弊摘發吏奸每布衣草帽私詢民隱惡棍皆斂迹逃避自用甚廉事有不便於民者必力鋤去亦饒幹有膽略雖上憲不能奪

其操尋陞劍州知州去邑人謂百年來循良楊公乾晉第

一公次之暨本縣張公三人而已

按楊乾晉前志有傳徵信錄曰予詢之父老言

澄賢令必首推楊公詢其政蹟僅傳聞數事他弗知也然於畫板見其廉於復訊見其公於衙草尺許見其斷夫士君子修身行己能改過者鮮矣卽公復訊一事不己加人一等哉

郭傳芳字九芝大同威遠衛人由選貢授咸甯縣佐博學能文章一時陝多名士傳芳皆與爲友四方來遊者率介

傳芳爲交通時人呼爲理學官牙康熙七年署邵陽事有

正俗略與遊梁山記載邵令錢公宰莘退食錄

按傳芳前志似略今

補詳之徵信錄曰本朝初年士皆稽古好學雖微小職中亦有博學能文者錄之以誌一時之盛

簡庭佐字治六湖南邵陽人由舉人知華陰縣其政通人和前志已詳載之惟署澄城縣時邑里甲大小懸殊差徭輕重或至倍蓰庭佐至均其里甲凡數月乃定澄民至今德之

徵信錄曰公均役時民有獷悍者率其里甲抗拒不服控府未已也至於控省猶未已至集眾登城若敵

人然公乃佩刀升堂與論曲直久之事始定民之挾私難治也如此然公於是時亦可謂有爲矣

吉年字秋畬鑲藍旗滿洲人道光壬午進士性嚴毅學問淹雅有幹濟材洎同數年政簡刑清勤於課士公餘每游藝射圃習勞眷屬妻子媳三口役惟一僕一婢而已遇旱步禱輒應屬有疑讞常策騎親往呼兩造立爲剖判不聽

株連不煩供億曰甯自勞苦毋累民也故習與夫常聚賭
年力禁止或設法掩執之無一脫者賭風頓息時城垣久
圯因移檄各屬捐助刻日興功完築二十年後回逆作亂
環攻卒保無恙蓋先事預防之力居多云郡人追感其德
於多忠勇公祠同朱申菴呂曼叔二守並置位祀之

以上補

王炳勳山西垣曲進士由鳳翔調守同州雅重文事手評
課卷勗士類績學勵品值天旱躬禱城隍廟論陰陽職司
期三日不雨卽封其門免冠叩首額上硃破寸許時天尙
晴少頃大雨人謂誠意所感云